

(შევიდა ცვლილებები და დამატებები ბსუ-ს წარმომადგენლობითი საბჭოს 2016 წლის 13 ივლისის N01, 2016 წლის 27 ოქტომბრის N04, 2016 წლის 16 დეკემბრის N02, 2017 წლის 15 თებერვლის N03, 2017 წლის 20 დეკემბრის N02 და 2018 წლის 13 ივლისის N03 გადაწყვეტილებებით)

## საჯარო სამართლის იურიდიული პირის - ბათუმის შოთა რუსთაველის სახელმწიფო უნივერსიტეტის სტუდენტთა სწავლის საფასურის გადახდის წესი

### მუხლი 1. ზოგადი დებულება

წინამდებარე წესი განსაზღვრავს საჯარო სამართლის იურიდიული პირის - ბათუმის შოთა რუსთაველის სახელმწიფო უნივერსიტეტის (შემდეგში „ბსუ“) სტუდენტთა სწავლის საფასურის გადახდის საფუძველს, ფორმას, პერიოდულობას, გადაუხდელობის სამართლებრივ შედეგებს, ასევე სწავლის საფასურის გადახდისაგან განთავისუფლებისა და სასწავლო/სამეცნიერო მიზნით ბსუ-ს სტუდენტის უცხო ქვეყანაში კონფერენციაზე/სემინარზე/კონგრესზე დასწრების (მონაწილეობის) ნაწილობრივი დაფინანსების საფუძველს.

### მუხლი 2. სწავლის საფასურის გადახდის (ადმინისტრაციული რეგისტრაციის) საფუძველი და ფორმა

1. ბსუ-ს სტუდენტის სწავლის საფასურის ოდენობა (ტარიფი) ბსუ-ს საგანმანათლებლო პროგრამების მიხედვით განისაზღვრება ბსუ-ს წარმომადგენლობითი საბჭოს გადაწყვეტილებით.
2. სწავლის საფასურის გადახდის საფუძველია ბსუ-ს სტუდენტის აქტიური სტატუსი.
3. სასწავლო გრანტის/სამაგისტრო გრანტის მფლობელი სტუდენტის სწავლის საფასურს ანაზღაურებს საქართველოს განათლებისა და მეცნიერების სამინისტრო, კანონმდებლობით დადგენილი წესით, სტუდენტის მიერ მოპოვებული გრანტის პროცენტული ოდენობის შესაბამისად.
4. ბსუ-ს სტუდენტი, რომელმაც ვერ მოიპოვა სასწავლო გრანტი/სამაგისტრო გრანტი, ვალდებულია სწავლის საფასური გადაიხადოს (გაიაროს ადმინისტრაციული რეგისტრაცია) შემდეგი რეკვიზიტების გათვალისწინებით: მიმღების ბანკი - სახელმწიფო ხაზინა; მიღების დასახელება - ხაზინის ერთიანი ანგარიში; ბანკის კოდი - TRESGE 22; მიღების ანგარიში/სახაზინო კოდი - 7 0901 7289.

### მუხლი 3. სწავლის საფასურის გადახდის პერიოდულობა (შევიდა ცვლილება წარმომადგენლობითი საბჭოს 2016 წლის 16 დეკემბრის N02 გადაწყვეტილებით)

1. ბსუ-ს სტუდენტი, გარდა იმ სტუდენტისა, რომელმაც მოიპოვა 100%-იანი სასწავლო გრანტი/სამაგისტრო გრანტი ან პროგრამული დაფინანსება, ვალდებულია ყოველ სასწავლო

სემესტრში გაიაროს ადმინისტრაციული რეგისტრაცია - გადაიხადოს სწავლის წლიური საფასურის ნახევარი.

2. სასწავლო სემესტრის დაწყებისა და დასრულების პერიოდი განისაზღვრება ბსუ-ს აკადემიური საბჭოს დადგენილებით ან ბსუ-ს რექტორის ბრძანების საფუძველზე, რომელიც ქვეყნდება ბსუ-ს ვებ გვერდზე ([www.bsu.edu.ge](http://www.bsu.edu.ge)).

3. ყოველი სასწავლო წლის (სემესტრის) დასაწყისში ბსუ-ს რექტორის ბრძანებით დგინდება ბსუ-ს სტუდენტთა მიერ ადმინისტრაციული რეგისტრაციის გავლის პერიოდი - სწავლის სემესტრული საფასურის გადახდის თარიღი. ბსუ-ს უცხოენოვანი საგანმანათლებლო პროგრამების სტუდენტთა მიერ სწავლის საფასურის გადახდის პერიოდი განისაზღვრება ამ პროგრამის განხორციელების მიზნით გაფორმებული მემორანდუმის (ხელშეკრულების) პირობების გათვალისწინებით (ასეთის არსებობის შემთხვევაში).

4. ბსუ-ს რექტორის ბრძანებით განისაზღვრება სემესტრული სწავლის საფასურის ნაწილ-ნაწილ (ეტაპებად) გადახდის შესაძლებლობა და ყოველ ეტაპზე გადასახდელი ოდენობა, რაც არ გამორიცხავს სტუდენტისათვის მთელი სემესტრის სწავლის საფასურის დარიცხვას (სტუდენტს არ დაერიცხება მიმდინარე სემესტრის სწავლის საფასური, თუკი შეუჩერდება ბსუ-ს სტუდენტის სტატუსი შემოდგომის სემესტრში 1 ნოემბრამდე, ხოლო გაზაფხულის სემესტრში - 1 აპრილამდე).

5. დოქტორანტი, როგორც სტუდენტი, გაივლის ადმინისტრაციულ რეგისტრაციას ამ წესითა და ბსუ-ს რექტორის ბრძანებით დადგენილ ვადებში. სასწავლო კომპონენტის - არანაკლებ 60 კრედიტის საფასურის გადახდა ხორციელდება პირველ სასწავლო წელს. სამეცნიერო კომპონენტის შესრულებისათვის საჭირო თანხის (სამეცნიერო ხელმძღვანელის მოწვევის, ადმინისტრაციული ხარჯის და სხვა) გადახდის ვალდებულება კი თანაბრად ნაწილდება დოქტორანტის მომდევნო ორი სასწავლო წლის განმავლობაში. დოქტორანტის სწავლის საფასურთან დაკავშირებული ვალდებულება აისახება მის მიერ ხელმოწერილ, ხარჯთაღრიცხვაში, რომელიც არის ბსუ-ს და დოქტორანტს შორის გაფორმებული ხელშეკრულების განუყოფელი ნაწილი.

#### **მუხლი 4. სტუდენტის სტატუსის შეჩერება/შეწყვეტა და ფინანსური ვალდებულება**

1. სასწავლო სემესტრის დაწყებიდან 45 დღის განმავლობაში ბსუ-ს სტუდენტის სტატუსის შეწყვეტის შემთხვევაში მას არ ეკისრება ამ სემესტრის სწავლის საფასურის გადახდის ვალდებულება (თუკი გადახდილი აქვს, საკუთარი განცხადების საფუძველზე სრულად უბრუნდება).

„1.შემოდგომის სემესტრში პირველ ნოემბრამდე მდგომარეობით, ხოლო გაზაფხულის სემესტრში პირველ აპრილამდე მდგომარეობით ბსუ-ს სტუდენტის სტატუსის შეწყვეტის/შეჩერების შემთხვევაში, სტუდენტს არ დაერიცხება მიმდინარე სემესტრის სწავლის საფასური (თუკი გადახდილი აქვს წინასწარ, პირადი განცხადების საფუძველზე დაუბრუნდება)“. *(შვიდა ცვლილება წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე)*

2. სასწავლო სემესტრის დაწყებიდან 45 დღის განმავლობაში, პირადი განცხადების შესაბამისად ბსუ-ს სტუდენტის სტატუსის შეწყვეტის ან შეჩერების შემთხვევაში, სტუდენტს დაუბრუნდება წინასწარ გადახდილი მხოლოდ მომდევნო სემესტრის სწავლის საფასური, ადმინისტრაციის ხელმძღვანელის სახელზე წარმოდგენილი განცხადების საფუძველზე.

„2. შემოდგომის სემესტრში პირველი ნოემბრის შემდეგ, ხოლო გაზაფხულის სემესტრში პირველი აპრილის შემდეგ ბსუ-ს სტუდენტის სტატუსის შეწყვეტის ან შეჩერების შემთხვევაში, სტუდენტს, პირადი განცხადების საფუძველზე გამოცემული ადმინისტრაციის ხელმძღვანელის ბრძანებით უკან დაუბრუნდება წინასწარ გადახდილი მომდევნო სემესტრის სწავლის საფასური. იმ შემთხვევაში, თუკი სტუდენტს არ გაუვლია აკადემიური რეგისტრაცია ან/და სასწავლო პროცესის მართვის ელექტრონულ სისტემაში არ ფიქსირდება მისი აკადემიური აქტივობა, პირადი განცხადების საფუძველზე დაბრუნებას ექვემდებარება ასევე მიმდინარე სემესტრში გადახდილი სწავლის საფასური. სასწავლო გრანტის მფლობელი/სახელმწიფო დაფინანსების მქონე სტუდენტის სწავლის საფასურის ბსუ-ს ანგარიშზე ჩარიცხვის შემთხვევაში, ამ სტუდენტს ჩათვლება იგი გადახდილად სასწავლო პროცესში დაბრუნების შემდეგ შესაბამისი სემესტრით (როდესაც უნდა შეჩერებოდა სტუდენტის სტატუსი) გათვალისწინებული სასწავლო კურსების სწავლის საფასურში“. *(შევიდა ცვლილება წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე)*

3. ბსუ-ს სტუდენტის სტატუსის შეწყვეტისას/შეჩერებისას, გასულ პერიოდში გადახდილი სწავლის საფასური სტუდენტს უკან არ დაუბრუნდება, გარდა იმ შემთხვევისა, როცა მას წინასწარ ჰქონდა გადახდილი მომდევნო სასწავლო წლის/სემესტრის სწავლის საფასური. სწავლის საფასურის ეტაპობრივად გადახდის შემთხვევაშიც კი, დაბრუნებას ექვემდებარე მხოლოდ წინასწარ გადახდილი მომდევნო სემესტრის სწავლის საფასური.

4. ბსუ-ს სტუდენტის სტატუსზე შეჩერებული პირის მიერ ბსუ-ს სტუდენტის სტატუსის შეწყვეტის შემთხვევაში, იგი ვალდებულია გადაიხადოს მასზე დარიცხული ფინანსური დავალიანება იმ შემთხვევაშიც კი, თუკი მას სტატუსის შეჩერების გამო არ მიეცა შესაბამის სემესტრში გამოცდების ჩაბარების შესაძლებლობა ან/და მისგან გამოწვეული მიზეზით არ შეასრულა ხელშეკრულებით ნაკისრი ვალდებულება სწავლასთან დაკავშირებით.

5. საგანმანათლებლო პროგრამით გათვალისწინებულ ვადებში სტუდენტს უნარჩუნდება ხელშეკრულებით დადგენილი სწავლის საფასურის ოდენობა, ხოლო აღდგენის წესით ჩარიცხვის ან/და სტუდენტის სტატუსის შეჩერების საფუძველების აღმოფხვრის შემთხვევაში, იგი ვალდებულია გადაიხადოს შესაბამის საგანმანათლებლო პროგრამაზე მიმდინარე სასწავლო წლისათვის დადგენილი სწავლის საფასური.

6. ადმინისტრაციული რეგისტრაციის ვადის გასვლის შემდეგ პერიოდში ბსუ-ს სტუდენტის სტატუსის შეჩერების შესახებ სამართლებრივი აქტის ძალადაკარგულად ცნობის (სასწავლო პროცესში აღდგენის) შემთხვევაში, სტუდენტს ამავე აქტით განესაზღვრება ადმინისტრაციული რეგისტრაციის ვადა, რომელიც არ უნდა აღემატებოდეს 7 (შვიდ) კალენდარულ დღეს.

7. ფინანსური დავალიანების გამო სტატუსზე შეჩერებული პირის სტუდენტის უფლებებში აღდგენა (სტუდენტის სტატუსის შეჩერების აქტის ძალადაკარგულად ცნობა) ხორციელდება შიდა მობილობის საშუალებით, ფინანსური დავალიანების დაფარვის შემდეგ. დამამთავრებელი სემესტრის სტუდენტის სტატუსში აღდგენა, რომელმაც სრულად შეასრულა შესაბამისი პროგრამის მოთხოვნები, დასაშვებია შიდა მობილობის პროცედურების გარეშე, თუკი სტუდენტი დაფარავს ფინანსურ დავალიანებას და წარმოადგენს განცხადებას კვალიფიკაციის

მინიჭების თაობაზე. დამატებითი სემესტრის ფინანსური დავალიანების მქონე სტუდენტს უწყდება სტუდენტის სტატუსი. *(შევიდა ცვლილება წარმომადგენლობითი საბჭოს 2018 წლის 13 ივლისის N03 გადაწყვეტილებით)*

8. იმ მაგისტრანტების/დოქტორანტების სასწავლო პროცესში დაბრუნება (აღდგენა), რომელთაც ფინანსური დავალიანების გამო შეუჩერდათ ბსუ-ს სტუდენტის სტატუსი და შესასრულებლად დარჩენილი აქვთ მხოლოდ „სამაგისტრო ნაშრომის შესრულება“/სამეცნიერო-კვლევითი კომპონენტი, დასაშვებია ამ წესით განსაზღვრული შეზღუდვების გარეშე.

#### **მუხლი 5. გაცვლითი სასწავლო პროგრამის (პროექტის) მონაწილე ბსუ-ს სტუდენტის ფინანსური ვალდებულება**

1. გაცვლითი სასწავლო პროგრამის (პროექტის) მონაწილე ბსუ-ს სტუდენტს (მათ შორის დოქტორანტს) უცხო ქვეყნის უმაღლეს საგანმანათლებლო დაწესებულებაში მობილობის პერიოდში არ უჩერდება ბსუ-ს სტუდენტის სტატუსი. იგი უფლებამოსილია უცხოეთში გამგზავრებამდე ან/და იქ სწავლის პერიოდში გადაიხადოს ბსუ-ში მიმდინარე პერიოდის სწავლის საფასური, თუმცა გადაუხდელობის შემთხვევაში მას არ შეუჩერდება ბსუ-ს სტუდენტის სტატუსი (მხოლოდ, უცხოეთიდან ჩამოსვლისა და ბსუ-ში სწავლის გაგრძელებამდე).

2. გაცვლითი სასწავლო პროგრამის (პროექტის) მონაწილე ბსუ-ს სტუდენტი ვალდებულია ბსუ-ს სტუდენტებისათვის დადგენილი, გასული სემესტრის (სემესტრების) სწავლის საფასური გადაიხადოს სრულად, უცხო ქვეყანაში სწავლების პერიოდის დასრულების შემდეგ ბსუ-ში სწავლის გაგრძელებისთანავე (არაუგვიანეს 7 კალენდარული დღისა), ხოლო მიმდინარე სემესტრის სწავლის საფასური - მიმდინარე სასწავლო წელს დადგენილი ადმინისტრაციული რეგისტრაციის ვადებში.

3. ბსუ-ს საგანმანათლებლო პროგრამაზე სასწავლებლად დაბრუნების შემდეგ შედგენილი „პროგრამების თავსებადობის დასკვნის“ მიხედვით განსხვავებული საგნების (კრედიტების) ათვისების საჭიროებისას, სტუდენტი, რომელსაც გადახდილი აქვს უცხოეთში სწავლის პერიოდის სწავლის საფასური ბსუ-ში, დამატებით არ იხდის ამ კრედიტების საფასურს.

4. უცხოეთში ათვისებული კრედიტების აღიარების შესაბამისად გამოიცემა ბსუ-ს რექტორის ბრძანება გაცვლითი პროგრამის მონაწილე სტუდენტისათვის ერთჯერადი სტიპენდიის დანიშვნის თაობაზე. სტიპენდიის ოდენობა არის სტუდენტისათვის აღიარებული კრედიტების საფასურის ექვივალენტი. სტიპენდიის დანიშვნის აქტი არ გამოიცემა, თუკი გაცვლითი პროგრამის მონაწილე სტუდენტის მიერ განსხვავებული საგნების ათვისებისათვის უნივერსიტეტმა უნდა გაიღოს დამატებითი ხარჯი (სპეციალურად ამისათვის მოიწვიოს პროფესორ-მასწავლებლები). ასეთ შემთხვევაში სტიპენდიის დანიშვნისა და გაცემის შესახებ სამართლებრივი აქტების გამოცემის საფუძველია შესაბამისი ფაკულტეტის დეკანის დასაბუთებული მოხსენებითი ბარათი და სტუდენტის განცხადება.

„4. ბსუ-ს გაცვლითი პროგრამის ფარგლებში უცხოეთში ათვისებული, ბსუ-ს საგანმანათლებლო პროგრამასთან თავსებადი კრედიტების (სასწავლო კომპონენტის) აღიარების შესახებ სამართლებრივი აქტის, სტუდენტის განცხადებისა და შესაბამისი ფაკულტეტის დეკანის დასაბუთებული სამსახურებრივი ბარათის საფუძველზე გამოიცემა ბსუ-ს რექტორის ბრძანება გაცვლითი პროგრამის მონაწილე სტუდენტისათვის ერთჯერადი სტიპენდიის დანიშვნის თაობაზე. სტიპენდიის ოდენობა განისაზღვრება აღიარებული კრედიტების საფასურის შესაბამისად. იმ შემთხვევაში, თუკი სტუდენტის არჩევანის შესაბამისად, უცხოეთში ათვისებული (ე.წ. თავისუფალი კომპონენტის/არჩევითი კურსების სახით) და აღიარებული

კრედიტების ოდენობა აჭარბებს ბსუ-ს საგანმანათლებლო პროგრამით განსაზღვრული კრედიტების საერთო რაოდენობას, სტიპენდია გაიცემა პროგრამით გათვალისწინებული კრედიტების ფარგლებში (თუკი სწავლის საფასური გადახდილია). სტიპენდიის დანიშვნის აქტი არ გამოიცემა, თუკი გაცვლითი პროგრამის მონაწილე სტუდენტის მიერ განსხვავებული სასწავლო კურსების ათვისებისათვის უნივერსიტეტმა უნდა გაიღოს დამატებითი ხარჯი (მოიწვიოს პროფესორ-მასწავლებლები).“ *(შევიდა ცვლილება წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე).*

5. ამ მუხლით განსაზღვრული ფინანსური ვალდებულების შეუსრულებლობის შემთხვევაში სტუდენტზე გავრცელდება წინამდებარე წესის მე-8 მუხლით გათვალისწინებული მოთხოვნები.

**მუხლი 6. სწავლის საფასური სასწავლო კურსის განმეორებით ან დამატებით გავლისათვის** *(შევიდა ცვლილება წარმომადგენლობითი საბჭოს 2018 წლის 13 ივლისის N03 გადაწყვეტილებით, რომელიც ამოქმედდება 2018-2019 სასწავლო წლიდან)*

„1. სტუდენტი, როგორც წესი, მიმდინარე სემესტრში არეგისტრირებს შესაბამისი პროგრამით გათვალისწინებულ კრედიტებს (აკადემიური რეგისტრაცია), რომელიც ხორციელდება ბსუ-ს სასწავლო პროცესის მარეგულირებელი წესისა და აკადემიურ/ადმინისტრაციულ რეგისტრაციასთან დაკავშირებით გამოცემული ბსუ-ს რექტორის ბრძანებით განსაზღვრულ ვადებში.

2. სტუდენტის ფინანსური ვალდებულება მიმდინარე სემესტრში განისაზღვრება სწავლის სემესტრული გადასახადით (წლიური საფასურის ნახევარი), გარდა იმ შემთხვევისა, როცა სტუდენტს დარეგისტრირებული აქვს პროგრამით გათვალისწინებულზე ნაკლები ან მეტი ოდენობით კრედიტები (ამ შემთხვევაში სტუდენტი სწავლის საფასურს იხდის დარეგისტრირებული კრედიტების შესაბამისად). მიმდინარე სემესტრში პროგრამით გათვალისწინებულისაგან განსხვავებული ოდენობით კრედიტების დარეგისტრირება დასაშვებია შემდეგ შემთხვევებში:

ა) მიმდინარე სემესტრის პროგრამით გათვალისწინებულ სასწავლო კურსის წინაპირობა არის რომელიმე სხვა სასწავლო კურსი, რომელშიც სტუდენტს აქვს უარყოფითი შეფასება („F-ჩაიჭრა“), რის გამოც ესაჭიროება სასწავლო კურსის განმეორებით გავლა (ე.წ. „კურსის გავლა“);

ბ) მობილობის შედეგად (შიდა/გარე/გაცვლითი პროგრამა) მიმდინარე სასწავლო კურსების გავლის ვალდებულება სტუდენტს არ აქვს (არეგისტრირებს განსხვავებულ სასწავლო კურსებს);

გ) ერთი სასწავლო წლის განმავლობაში ასათვისებელი კრედიტების ზღვრული ოდენობის (75 კრედიტის) ფარგლებში სტუდენტს სურს შეფასების გაუმჯობესების მიზნით განმეორებით დაარეგისტრიროს სასწავლო კურსი ან/და დამატებით - სხვა სასწავლო კურსი.

3. სტუდენტთა აკადემიური რეგისტრაციების შესახებ დამუშავებული ინფორმაცია, აკადემიური რეგისტრაციის (ცვლილებების რეგისტრაციის) დასრულებიდან 5 სამუშაო დღეში, მაგრამ არაუგვიანეს სემესტრის დაწყებიდან 20 კალენდარული დღისა, ფაკულტეტების დეკანების მიერ წარედგინება ბსუ-ს რექტორს/ადმინისტრაციის ხელმძღვანელს, სტუდენტთა ფინანსური დავალიანების განსაზღვრისა და სტატუსის შეჩერების პროცედურების წარმართვის მიზნით.

4. წინამდებარე მუხლით გათვალისწინებული განმეორებით/დამატებით გასავლელი სასწავლო კურსების სწავლის საფასური განისაზღვრება შესაბამის საგანმანათლებლო პროგრამაზე

სწავლის წლიური საფასურით (მაგალითად: სწავლის წლიური საფასურია 2250 ლარი, ერთი კრედიტის საფასური იქნება (2250: 60 კრედიტზე=) 37 ლარი 50 თეთრი).

## **მუხლი 7. სტუდენტთა საუნივერსიტეტო დაფინანსება**

1. ბსუ-ში სწავლის საფასურის გადახდისაგან, შესაბამისი საგანმანათლებლო პროგრამის ვადით, თავისუფლდებიან მშობლების მზრუნველობას მოკლებული სტუდენტები (დედ-მამით ობოლი ან უგზო-უკვლოდ დაკარგულად/გარდაცვლილად აღიარებული მშობლების შვილები). სტუდენტის მიერ შესაბამისი განცხადებისა და დოკუმენტების წარმოდგენის შემთხვევაში გამოიცემა ადმინისტრაციის ხელმძღვანელის ბრძანება.

1. ბსუ-ში სწავლის საფასურის გადახდისაგან, შესაბამისი საგანმანათლებლო პროგრამით გათვალისწინებული კრედიტების საფასურის ფარგლებში, ადმინისტრაციის ხელმძღვანელის ბრძანებით თავისუფლდებიან მხოლოდ საბაკალავრო საგანმანათლებლო პროგრამის სტუდენტები, რომლებიც არიან მშობლების მზრუნველობას მოკლებულნი (დედ-მამით ობოლი ან უგზო-უკვლოდ დაკარგულად/გარდაცვლილად აღიარებული მშობლების შვილები). ბრძანება გამოიცემა სემესტრის დაწყებიდან არაუგვიანეს 1 (ერთი) თვისა სტუდენტის განცხადებისა და შესაბამისი დოკუმენტების წარმოდგენის შემთხვევაში. ადმინისტრაციის ხელმძღვანელი უფლებამოსილია ამ კატეგორიის სტუდენტი გაათავისუფლოს ბსუ-ში სწავლის საფასურის გადახდისაგან:

ა) მიმდინარე სასწავლო სემესტრის დასაწყისიდან, თუკი განთავისუფლების ამ პუნქტით გათვალისწინებული საფუძველი არსებობდა ამ სემესტრის დაწყებამდე, თუმცა განცხადებისა და შესაბამისი დოკუმენტაციის წარმოდგენა სტუდენტმა საპატიო მიზეზით დააგვიანა (წარმოადგინა სემესტრის დასრულებამდე);

ბ) მომდევნო სასწავლო სემესტრის დასაწყისიდან, თუკი განთავისუფლების ამ პუნქტით გათვალისწინებული საფუძველი მიმდინარე სემესტრის განმავლობაში ან მომდევნო სემესტრის დაწყებამდე და სტუდენტმა წარმოადგინა განცხადება თანდართული დოკუმენტაციით

*(შევიდა ცვლილება წარმომადგენლობითი საბჭოს 2017 წლის 20 დეკემბრის N02 გადაწყვეტილებით, პირველი პუნქტის წინამდებარე რედაქცია ამოქმედდება 2018-2019 სასწავლო წლიდან).*

2. სწავლის საფასურის გადახდასთან დაკავშირებით შეღავათები გარდა ამ მუხლის პირველი პუნქტით განსაზღვრული შემთხვევისა, ბსუ-ს სტუდენტთათვის შეიძლება გავრცელდეს მხოლოდ სპეციალური სოციალური პროგრამის ფარგლებში ან/და წარმომადგენლობითი საბჭოს გადაწყვეტილებით/ადმინისტრაციის ხელმძღვანელის ბრძანებით.

3. სპეციალურ სოციალურ პროგრამას (დაფინანსების/შეღავათების სახეებს, პირობებს, სტუდენტთა კატეგორიასა და განხორციელების წესს) შეიმუშავენ ადმინისტრაციის ხელმძღვანელი და დასამტკიცებლად წარუდგენს წარმომადგენლობითი საბჭოს.

4. წარმომადგენლობითი საბჭოს მიერ დამტკიცებული წესის შესაბამისად ადმინისტრაციის ხელმძღვანელი გამოსცემს ბრძანებას ბსუ-ს სტუდენტთათვის სწავლის დაფინანსების/ შეღავათის მინიჭების შესახებ.

5. სასწავლო/სამეცნიერო მიზნით ბსუ-ს სტუდენტის უცხო ქვეყანაში კონფერენციაზე/სემინარზე/კონგრესზე დასწრების (მონაწილეობის) ნაწილობრივი დაფინანსების

შესახებ სტუდენტის განცხადებას განიხილავს შესაბამისი ფაკულტეტის საბჭო, რომლის დადებითი გადაწყვეტილების შემთხვევაში ფაკულტეტის დეკანი სამსახურებრივი ბარათით მიმართავს ადმინისტრაციის ხელმძღვანელს. ადმინისტრაციის ხელმძღვანელის მიერ გამოცემა შესაბამისი ბრძანება, თუკი სტუდენტების დაფინანსებისათვის ხარჯი ერთი სემესტრის განმავლობაში არ აღემატება შესაბამისი ფაკულტეტის სტუდენტთა მიერ წინა სემესტრში გადახდილისწავლის საფასურის საერთო რაოდენობის 1 (ერთ) %-ს. ამასთან, ერთი სტუდენტის დაფინანსების თანხა არ უნდა აღემატებოდეს 1000 (ათას) ლარს.

6. გარდაცვალების გამო ბსუ-ს სტუდენტის სტატუსის შეწყვეტა ბსუ-ს წინაშე არსებული ამ პირის სახელზე არსებული ფინანსური დავალიანების (დარიცხული სწავლის საფასურის) გაუქმების საფუძველია. ასეთ შემთხვევაში შესაბამისი ფაკულტეტის დეკანის მოხსენებითი ბარათისა და საგანმანათლებლო დაწესებულებების რეესტრის მონაცემების საფუძველზე გამოცემა ადმინისტრაციის ხელმძღვანელის ბრძანება **(შევიდა დამატება წარმომადგენლობითი საბჭოს 2016 წლის 16 დეკემბრის N02 გადაწყვეტილებით).**

7. ბსუ-ს სტუდენტის სწავლის საფასური შეიძლება დაიფაროს ბსუ-ს ბიუჯეტიდან, თუკი პირი საქართველოს განათლებისა და მეცნიერების სამინისტროს მიერ ბსუ-სთვის პროგრამული დაფინანსების მოცულობის ფარგლებში (დადგენილი კვოტის - დასაფინანსებელი სტუდენტთა რაოდენობის ფარგლებში) ჩაირიცხა დაფინანსებად პრიორიტეტულ საგანმანათლებლო პროგრამაზე სტუდენტთა მობილობის/შიდა მობილობის განხორციელების შედეგად ან აღდგენილი იქნა ბსუ-ს სტუდენტის სტატუსში (შეჩერებული ქონდა) და ბსუ-ს იღებს (ან უკვე მიღებული აქვს) შესაბამისი ოდენობით პროგრამულ დაფინანსებას **(შევიდა დამატება წარმომადგენლობითი საბჭოს 2016 წლის 16 დეკემბრის N02 გადაწყვეტილებით; ძალადაკარგულად იქნა ცნობილი წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე);**

8. წინამდებარე მუხლის მე-7 პუნქტით გათვალისწინებულ შემთხვევაში, შესაბამისი ფაკულტეტის დეკანი უფლებამოსილია, საქართველოს განათლებისა და მეცნიერების სამინისტროს მიერ პროგრამული დაფინანსების გაცემის მიზნის გათვალისწინებით, დასაბუთებული წარდგინებით მიმართოს ბსუ-ს რექტორს, დადგენილი კვოტის ფარგლებში, სტუდენტის (სტუდენტთა) შესაბამისი სასწავლო წლის (სემესტრის) სწავლის საფასურის გადახდისაგან სრული ან ნაწილობრივი განთავისუფლების თხოვნით (პროგრამული დაფინანსებიდან მიღებული თანხიდან ამ სტუდენტის სწავლის საფასურის დაფარვა) **(შევიდა დამატება წარმომადგენლობითი საბჭოს 2016 წლის 16 დეკემბრის N02 გადაწყვეტილებით; ძალადაკარგულად იქნა ცნობილი წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე);**

9. თუ ბსუ-ს პრიორიტეტულ საგანმანათლებლო პროგრამაზე მობილობის/შიდამობილობის/აღდგენის მსურველთა რაოდენობა აღემატება სამინისტროს მიერ დაფინანსებადი ადგილების რაოდენობას, ბსუ-ს რექტორის ბრძანების შესაბამისად დაფინანსება შეიძლება მიიღოს იმ სტუდენტმა, რომლის ერთიანი ეროვნული გამოცდების შედეგები აღემატება სხვა მსურველთა შედეგებს. თუ 2 ან მეტი თანაბარქულიანი სტუდენტია, დაფინანსებას მოიპოვებს ის სტუდენტი, რომლის აკადემიური მოსწრების საშუალო მაჩვენებელი მეტია **(შევიდა დამატება წარმომადგენლობითი საბჭოს 2016 წლის 16 დეკემბრის N02 გადაწყვეტილებით; ძალადაკარგულად იქნა ცნობილი წარმომადგენლობითი საბჭოს 2017 წლის 20**

დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე).

#### **მუხლი 8. სწავლის საფასურის გადაუხდელობის შედეგი**

1. სტუდენტი, თუკი შესაბამის სემესტრში, რექტორის ბრძანებით დადგენილ ვადაში არ გაივლის ადმინისტრაციულ რეგისტრაციას - არ გადაიხდის სწავლის საფასურს, ბსუ-ს რექტორის ბრძანებით დადგენილ ვადაში შეუჩერდება ბსუ-ს სტუდენტის სტატუსი (**შევიდა ცვლილება წარმომადგენლობითი საბჭოს 2016 წლის 27 ოქტომბრის N04 გადაწყვეტილებით**).

1. რექტორის ბრძანებით დადგენილ ვადაში ადმინისტრაციული რეგისტრაციის გაუვლელობის - სწავლის საფასურის გადაუხდელობის შემთხვევაში, სტუდენტს შეუჩერდება ბსუ-ს სტუდენტის სტატუსი. სტუდენტის პირადი განცხადების საფუძველზე შესაძლებელია ბსუ-ს სტუდენტის სტატუსის შეჩერების აქტის გამოცემის გადავადება ერთი თვით, მაგრამ არაუგვიანეს შესაბამისი სემესტრის დასრულებამდე (**შევიდა ცვლილება წარმომადგენლობითი საბჭოს 2017 წლის 20 დეკემბრის N02 გადაწყვეტილებით, რომელიც გავრცელდა 2017-2018 სასწავლო წლიდან წარმოშობილ ურთიერთობებზე**).

2. სტუდენტს, რომელსაც ბსუ-ს მიმართ გააჩნია ფინანსური დავალიანება, მაგრამ უკვე მინიჭებული აქვს აკადემიური ხარისხი (კვალიფიკაცია), გავლილი აქვს საგანმანათლებლო პროგრამა, მიეცემა დიპლომი ან ცნობა საგანმანათლებლო პროგრამის მოსმენის შესახებ, ასევე მის პირად საქმეში არსებული დოკუმენტაცია იმ შემთხვევაში, თუკი განაცხადებს თანხმობას ფინანსური ვალდებულების შესრულებისათვის. აღნიშნული შეთანხმება სტუდენტსა და ადმინისტრაციას შორის ფორმდება წერილობით.

3. ბსუ-ს სტუდენტს, რომელსაც წარდგენილი აქვს განცხადება (სხვადასხვა სახელმწიფო დაწესებულებებში თუ ბსუ-ს სტუდენტთა მხარდაჭერის ფონდში) სწავლის დაფინანსების მოპოვების მიზნით, შესაბამისი გადაწყვეტილების მიღებიდან 7 კალენდარული დღის გასვლამდე არ შეუჩერდება ფინანსური დავალიანების გამო ბსუ-ს სტუდენტის სტატუსი.

4. ბსუ-ს სტუდენტი უფლებამოსილია წერილობითი განცხადებით მოითხოვოს მის მიერ ზედმეტად გადახდილი სწავლის საფასურით სრულად ან ნაწილობრივ ბსუ-ს სხვა სტუდენტის სწავლის საფასურის დაფარვა (მიმდინარე სემესტრის სწავლის საფასური სტუდენტს ეთვლება ზედმეტად გადახდილად, თუკი მას შეუჩერდება სტუდენტის სტატუსი 1 ნოემბრამდე - შემოდგომის სემესტრში, ხოლო 1 აპრილამდე - გაზაფხულის სემესტრში) (**შევიდა ცვლილება წარმომადგენლობითი საბჭოს 2016 წლის 16 დეკემბრის N02 გადაწყვეტილებით**);

5. ნაწილობრივი სასწავლო/სამაგისტრო გრანტის მფლობელ პირს ამ გრანტის პროპორციულობის (სამინისტროდან მიღებული/მისაღები თანხის ოდენობის) გათვალისწინებით, მხოლოდ სასწავლო წლის პირველ სემესტრში შეიძლება არ შეუჩერდეს სტუდენტის სტატუსი.

6. ბსუ-ს სტუდენტს (გარდა დამამთავრებელი ან დამატებითი სემესტრის სტუდენტისა) ერთი სასწავლო სემესტრის განმავლობაში 100 ლარამდე დავალიანების შემთხვევაში არ შეუჩერდება ბსუ-ს სტუდენტის სტატუსი (აღნიშნული დავალიანება პირველ რიგში დაიფარება სტუდენტის მიერ უნივერსიტეტის ანგარიშზე შემოტანილი თანხიდან). (**შევიდა ცვლილება წარმომადგენლობითი საბჭოს 2018 წლის 13 ივლისის N03 გადაწყვეტილებით**)

#### **მუხლი 9. გარდამავალი დებულებები**

1. 2015-2016 სასწავლო წლის მეხუთე და მეექვსე ეტაპის ადმინისტრაციული რეგისტრაციის გაუვლელობის გამო ბსუ-ს სტუდენტის სტატუსის შეჩერების ბრძანება ბსუ-ს რექტორის მიერ



შეიძლება გამოიცეს ამ წესის მე-8 მუხლის პირველი პუნქტით გათვალისწინებული ვადის გასვლის შემდეგ, მაგრამ არაუგვიანეს 2016 წლის 27 ივლისისა *(შევიდა დამატება წარმომადგენლობითი საბჭოს 2016 წლის 27 ივლისის N02 გადაწყვეტილებით)*;

2. იმ სტუდენტებს, რომლებმაც ვერ მოიპოვეს 2016-2017 სასწავლო წლისათვის სოციალური პროგრამის ფარგლებში დაფინანსება, მათი მოთხოვნის საფუძველზე, 2016-2017 სასწავლო წლის გაზაფხულის სემესტრში სწავლის გაგრძელების შემთხვევაში, შემოდგომის სემესტრის სწავლის საფასური გადაუნაწილდეთ 2016-2017 წლის სასწავლო წლის ბოლომდე ეტაპობრივად გადასახდელად, ადმინისტრაციის ხელმძღვანელის სამართლებრივი აქტის შესაბამისად *(შევიდა დამატება წარმომადგენლობითი საბჭოს 2017 წლის 15 თებერვლის N03 გადაწყვეტილებით)*;